

欽定四庫全書薈要

集部

秋澗集卷六十八

詳校官助教臣謝登雋



欽定四庫全書薈要卷一萬六千二百二十三集部

秋澗集卷六十七

元 王惲 撰

翰林遺藁

增諡睿宗仁聖景襄皇帝玉冊文

東
三

再拜稽首言伏以至德難名於穆乾坤之大孝思罔

極有嚴祖考之稱稽遺美而載揚迺守文之先務弘宣
令問茂對耿光伏惟睿宗景襄皇帝秀拔神支淵潛龍
德英武內根於仁孝溫文外表乎謙恭先事而謀臨機

善斷當軍國撫監之際赫風雲冊伐之功川蜀威加宋
人為之褫氣釣臺戰捷金源遂不能兵闢土宇而靖中
邦翊炎圖而隆寶運策勲天府歸美皇靈方請命於上
蒼思保安於宗社祥開後聖光啓皇元致今日之隆平
蓋孫謀之燕翼惟天縱其睿智故澤流於子孫爰伸凝
慕之誠虔舉增徽之典詢諸輿議允協至公謹遣某官
某奉玉冊玉寶加上尊諡曰仁聖景襄皇帝廟號睿宗
適守先猷仰聖靈之如在式垂歆鑒降福祉于無疆

追諡先太子冊文

皇帝若曰於戲故皇太子某天姿玉裕茂德淵冲朕紹纂丕圖仰遵太祖聖武皇帝遺訓以爾世嫡元孫譽望攸屬爰從燕邸正位春宮愈貴能謙居貞益慎及夫聽政揆叙有方至於睦親昆仲無間尊師問道日御經筵視膳候安時詢內監佐予柔理惠彼小民方念神器匪輕授艱有託豈期前星揜耀永隔幽明日居月諸懷思曷已比者大臣敷奏宜易名奉祀光崇彝典今遣某官

特冊賜爾諡曰明孝太子永昭遺懿式慰朕懷尚冀明
靈歆承寵渥

皇太后玉冊文

惟至元三十一年歲次甲午五月某日嗣皇帝臣某謹
稽首再拜言洽萬國者莫隆於孝治揚懿德者必著其
徽稱洪惟我幼冲人嗣無疆大歷服率先風化無尚於
斯恭惟太母聖善懿恭睿識遠慮力行善事陰賜及民
隆孝敬於先朝軫憂勤於內助宮壺仰其規範宗族化

其肅雍誕藐躬而底於有成翊燕謀而俾登大寶深恩
至德蕩焉難名匪極鴻一作尊曷伸至願載惟昭考已

祔升於宗祧言念宸闈宜大崇其典禮庶幾均報仰答
恩慈今遣某官謹奉玉冊寶上尊號曰皇太后伏惟皇
太后殿下端處福宮誕膺顯冊儼母儀於四海德配坤
元期聖壽於萬年祥開神策永資慈訓保我子孫臣誠
歡誠抃稽首再拜謹言

改元詔

朕祇遵先猷嗣承丕構訪予落止在夙夜以靡遑永言
孝思閱歲時而增愴惟春秋之謹始寔古今之成規適
屆履端聿新紀號可改至元三十二年為元貞元年咨
爾有衆體予至懷

手詔侍郎楊大淵

省表具闕朕恪守王封遽膺推戴即位之始不遑康寧
惟爾遠戍邊陲久服戎政身外心內來陳賀章宣加寵
答之辭以勵忠貞之節故茲詔示想宜知悉

詔罷東平路管民總管兼行軍萬戶嚴忠齊

爾父承國家興運左右將士同心戮力封植東平屹為
名藩我祖宗嘉爾父之功乃建為侯自爾嗣位又二十
年朕初即政命復襲爵往即乃封敬之慎之其脩德砥
行自立名節勉圖後效無忝先猷十七日戊寅巳刻上
臨軒親諭諸路總尹遂以前東平總管嚴忠齊弟忠範
為東平總管仍戒之曰兄弟天倫事至於此朕甚憫焉
今予命爾主茲東土非以訟受之也彼所貴匪輕敬哉

今而後苟不克荷非若汝兄弟可免也

授賀某宣諭大理國制

幼懷竒節筮仕昌時及知遇於先朝遂撫綏于大理揚
威絕域昔收定遠之功服事彤庭屢抗伏波之請宜旌
前効俾煥綸章汝其宣揚皇猷洋溢方外爰體綏懷之
意以安遐邇之情轉為招徠式副所託

宣諭大理及合刺章俾還本土手詔

嘉汝等遠自雲南導從選鋒轉戰千里直披鄂渚以達

於此勤已至矣今者俾爾各還本土以遂厥性優賜各有差

姜真人手詔

神以知來智以藏往言念長江之邁未嘗一日而忘遐想仙標載勤駟傳雍容大厦論用復於細氈寂寞嚴扃雲暫辭於故隱春寒遣書指不多及

追封皇國舅阿齊諾延濟寧王諡忠武制

制曰疏恩異姓無踰王爵之崇追冊元勳况在世姻之

懿典禮所逮存亡靡殊故皇國舅阿齊諾延天挺英姿
志宣忠力當祖宗造基之始為股肱佐命之臣衍慶軒
星儷輝宸極惟勛闕之茂著冠戚里以獨高朕紹述丕
圖養懷世德宜錫大邦之號仍褒壹惠之文可進封濟
寧王諡曰忠武嗚呼議協明廷庸布絲綸之命澤流後
裔永昭泉壤之光尚想英靈歆此寵渥

皇舅濟寧王妃制

制曰爵以德崇既建真王之號婦因夫貴俾隆藩國之

儀眷我外家德昭祖母誕彌聖后作配先皇豈惟內助
之多光溢徽音之媿是宜管彤燧燧象服委蛇顧予冲
人獲紹前烈禮崇報本心焉敢忘可追封濟寧王妃與
對邦休服茲寵數重行姻親之懿永膺伉儷之榮泉壤
雖幽歆承罔昧

贈謚故光祿大夫左丞相都元帥烏珠制

制曰功德兼隆其所及者既遠存亡靡間故為報也必
豐迺眷元勲豈同常品故光祿大夫中書左丞相都元

帥烏珠挺英將種作世虎臣爪牙兼信布之材韜畧合
孫吳之法惟重厚克膺其委寄故謙恭不有其智能當
世祖之恢圖自元戎而宣力奠我南服隱若長城秉持
旄鉞者三十餘年出入行陳者百五十戰奮身不顧忠
如皎日之明愾敵無前勢若迅雷之擊載揚我武飛渡
長江佐收一統之功名出諸將之右繼將明命遠震邊
庭威方暢於皇靈訃遽聞於瀚海朕承先猷而祇懼念
王業之艱難鬱爾風雲追維往昔優加卹典用勸後人

官資超極品之榮封爵建大國之號於戲麟臺畫像豈
惟宛轉於丹青甲第賜書庸示昭光於寔宥可贈開府
儀同三司太尉并國公諡曰武宣精爽如在不昧欽承
太尉并國公夫人某氏制

平章政事布拉吉帶母巴爾斯章氏父為翊運宗臣嘗有
功於社稷夫亦折衝名將屢宣力於封疆位陟中台慶
鍾賢嗣惟是數者萃於一身其存歿則俱榮蓋始終之
鮮儼况內德壺儀之著而婦規母訓之崇錫之以翟芾

之章賁之以銀黃之飾沛殊恩於既往示深勸於將來
在邦彛皆所當然於世教其或有補於戲脂田肇啓獨
垂範於兩宗蘋饋相承尚流芳於百祀可贈并國太夫人
追諡司徒鞏公制

制曰節惠易名恩禮備飾終之典依光毓德風雲非一
日之期故具官某稟性淑均處心貞亮眷昭考當岐嶷
之際侍內廷多傳翼之功奉事兩宮勤勞有日爰念邸
潛之宿望特班邦教之殊階謀叅密近而屢効忠誠位

極崇高而愈形謙謹朕方欽于大寶將圖任于舊人已
聞歌露之悲可後蓋棺之議陽湖未遠想陪仙馭之遊
泉壤生光洞賁綸章之寵可贈金紫光祿大夫謚曰
忠懿有來精爽不昧歆承

追諡賽平章制

制曰人臣罄奉上之忠恩卹奚分於今昔國家有飾終
之典光揚亦賴於子孫於惟閔閱之家况復風雲之契
某官某儀刑西域柱石中朝以文武之長材蘊經綸之

大業爰從潜邸早識英資而又圖猷每沃於淵衷度量
獨高于天下四川分陝朝廷無西顧之憂六詔行臺郡
縣奠南服之理福星霖雨動應時祥和氣嘉聲撫綏殊
俗念匪躬而盡瘁每當饋以興哀朕祇奉先猷循思遠
節位兼將相德全始終况爾孫文光繩家訓弼子孝治
進貳文昌用推錫類之恩寵以上公之號於戲鑄金圖
像豈惟專媿於前賢告第頒書尚異傳芳於來世可贈
某官某謚英爽不昧其克欽承

賽平章國夫人誥

國治固先於家齊古今匪易婦秩諒從於夫貴典禮攸
宜某官夫人某氏婉自名家嬪我賢輔備法度而供壺
職以恭儉而相夫勞委蛇儼象服之尊恭懿融管彤之
美以正以順如山如河主饋宜家綿休積慶夫延登於
鼎祚孫進貳於文昌不以輝稱曷彰內助仍易小君之
號榮階極品之封於戲德容尚肅於舊儀誥鸞有煥脂
澤載光於故壠世祚彌昌可封某國太夫人諡某號主

者施行

追諡故都運梁公通憲先生制

制曰望壘思賢臣子無古今之間顯親盡孝國家有推
獎之崇矧茲文憲之傳篤我世臣之舊資德大夫中書
左丞梁按達拉故曾祖金中奉大夫司農少卿陟早登
科第顯歷仕途履正奉公材優國計持難抗節身為大
閑在先儒耆德之間有泰和能臣之譽經綸事徃道義
日尊流澤遠及於子孫致位有開於卿相克宣忠力勤

相我家不有卹章曷勸來者可賜諡曰通憲先生於戲
老成雖遠典刑猶見於國人寵數惟新潛德載光於泉
壤尚期英爽不昧歆承

太子少傅竇公制

傳經明道既輔立太平之基崇德報功烏可後非常之
典故桓傳致臨雍之敬而甘盤動憶舊之思古今雖殊
典秩不異故翰林侍講學士竇默業尊周孔學際天人
詢治體以綱常為言論人臣以功利為末侍講帝幄剴

切多文貞之風論相中書慷慨見陽城之烈而又三代
建國明倫是先惟西池儼籥羽之儀故東序擴人文之
化風移俗易一變虛文地闢天開載明正學廼眷兩朝
之耆德寔為先禰之功師稽考規模夢寐風采是用滌
分三事光融邦教之階恩賁九泉滿洒玉堂之淚有來
精爽服我寵靈

夫人賈氏誥辭

天人之際若弗可知禎祥之來各以類應凡祖宗父母

尊榮壽考未有不善善而致者具官某夫人某氏婉從
清望嬪我儒宗恭儉以相其夫勤恪以成其子玠璜中
節藻薦多儀清白傳家管彤有煒宜爾從夫之貴寵膺
華郡之封鸞詒副加服我休命

追諡賈博囉齊制

負鼎千時既逢其明主當饋起嘆有懷於昔賢某官藩
邸近臣中朝著德適際風雲之會素多監掌之功割烹
調和廼其常事威儀進退曲盡恒規凡侍殿庭望高德

度方舊人而圖任遽薤露以興哀歲月雖深德容如在
抱茂陵之弓劍婉孌何窮悵華屋之几筵未昭勅奠近
因廷奏大霈恩章可加贈某官諡曰某嗚呼授寵數以
如生幽明固間顧諸孫之行慶福祉方來慰我老成含
嘻泉壤

追諡呼爾察制

揚徽內職固有藉於世臣追錫親榮廼式遵於彛典某
官高闕集慶美行禔身早以謙恭光聯侍從藝則名而

威則隸責以已而功於人出入禁闈者幾三十年主典
玉食者或百餘事忠勤奉上夙宵在公每多燕饗之儀
何止割烹之技方廷章之宣美遞朝露以溘先可贈某
官某謚嗚呼祇奉仙遊悵同翻於儷景流光泉壤尚垂
慶於後人魂而有靈歆我寵數

進呈世祖皇帝實錄表

臣某等言臣聞典謨述堯舜之功令名顯著方策布文
武之政義問宣昭粵自漢隋及夫唐宋皆有信史以貽

後來況大業豐功震今耀古惟深善述首議丕揚臣等
誠惶誠懼頓首頓首洪惟世祖皇帝仁孝英明睿謀果
斷爰從潜邸有志斯民植根幹而佐理皇綱聘耆德而
講明治道始平大理再駕長江過化存神有征無戰迨
其龍飛灤水鼎定上都革弊政以惟新擴同仁而一視
規模宏遠朝野清明內則肇建宗祧創設臺省修舉政
令登崇俊良外則整治師徒申嚴邊將布揚威德柔服
蠻羌加以聖無不通明靡不燭守之以勤儉朴素養之

以慈惠雍和收攬權綱綜覈名寔賞罰公而不濫號令
出以惟行萬彙連茹羣雄入彀削平下土統正中邦慕
義向風聲教實朔南之暨梯山航海職貢無遐邇之殊
方且開學校而勸農桑考制度而興禮樂國號體乾坤之
統書畫煥奎壁之文罄所有而酌戰功不待計而救民
乏聽言擇善明德緩刑斂福錫民遇災知懼得洪範惟
皇之理過周宣修政之勤以致時和歲豐民安吏職蓋
帝德克周于廣運故至公均被以無方可謂文致太平

武定亂略繼一祖四宗之志兼三皇五帝之功開天建
極者三十五年立經陳紀者二萬餘事以謙讓弗違於備
紀故纂修未至於成書欽遇皇帝陛下寅紹貽謀厲精
圖治亟鑒觀於成憲思適駿于先聲深詔下臣俾為實
錄宅心宗祏凝孝羨牆開館局而增置官僚勅群司而
大紬圖籍編摩既富搜訪加詳採摭於時政之編參取
於起居之注張皇初藁增未見於罕聞承奉綸音俾蠲
繁而就簡俯殫管見仰體宸衷盡略虛文一存定事其

饗會征伐文物典章粲焉列三代之英蔚爾開萬世之
業與夫才德孝廉之士忠良姦佞之臣版圖生齒之實
繁財賦畜牧之富盛謹依條據粗致無遺今具所修成
世祖聖德神功文武皇帝寔錄二百一十卷事目五十
四卷聖訓六卷凡二百七十卷謹繕寫為二百七十秩
用黃綾夾複封全隨表上進宸房臣某等忝備台司幸
膺盛典顧惟載筆才何有於三長勉進蕪辭慮庶幾於
一得冒瀆聖聰不勝兢惕臣等無任瞻天望聖激切屏

營之至謹奉表陳進以聞臣某等誠惶誠懼頓首頓首
謹言

元貞元年六月四日開府儀同三司中書右丞相監
修國史臣某等上進

聖壽節賀表

至元十四年丁丑代中省作

伏以龍德御天協千載休明之運星虹流渚開九秋震
夙之祥正朔所頒臣民胥慶欽惟陛下長策遠御叡斷
有臨凡經制之宏規思光昭於先業修振古未修之典

集累朝未集之勲獨運神機載揚我武削平六詔無好大喜功之心混一三吳見伐罪弔民之舉治道已隆於

貞觀風聲仍邁於漢室尚深闕政之虞屢致遷衡之問詢謀元老懷保小民體羣臣敬其所尊免包徭以之固本而又禁酒酤而重民食憫兵餘而肆赦恩動順輿情

咸躋壽域繫爾至元之盛德優於行葦之深仁屬節屆於誕彌適躬臨於巡省臣某等久承均軸列侍瑤墀

一作

分司蘭省愧無金鑑之封章切劾露囊之微悃鳳來儀阻列冀堦

而倍舞聽簫韶九奏之音虎拜手而揚休祝天子萬年之壽

甲午賀正表

代中
省作

伏以寅宮建斗洪鈞轉一氣之春漢殿稱觴大禮重三朝之慶衣冠環拱文物昭融恭惟皇帝陛下乾健萃精睿思作聖頓皇綱而開大統備百度而冠前王澤既洽於域中威復加於海外中天而立躋世而平以富藏民惠免逋懸之賦先春肆赦恩深寬大之書繫至治之惟

馨致上天之神祐端臨正旦光動多儀受國籍而膺貢
珍醢臣工而湛春酒臣某等率先列辟抃舞揚休政與
時新萬有遂生成之樂壽從天降八秩開億兆之祥

大都城隍廟設醮保祐青詞

伏以天監雖高曾惕顯思之命基圖寅紹敢忘奉若之
誠爰自君臨頗歷年所顧眇躬之上託致至理之維艱
豈期外侮潛消復荷天休滋至炎風朔雪天開一統金穰
玉燭屢致豐年而又雲靜祁連春回沙漠晝日有平安

之報霜風無偃薄之雲匪涼德之能然皆聖靈之所祐
廼即青陽之月恭修金錄之科誥演琅函真臨玉境導
含景蒼精之駕覆垂雲洪蔭之仁鑒茲報謝之虔重以
保持之福干戈止息永惟四海之清邦國有懷亦尚一
人之慶

如式

至元三十年崇真宮設醮齋意

大元皇帝紹隆丕構撫御多方欲期中外之安致有憂
勤之慮爰資道蔭用介福寧擬於今月初三日就大部

崇真萬壽宮設金籙醮筵二百四十分位消日既良預
期以告

青詞

伏以纂承有在擴先業以丕隆撫御攸寧皆上天之申
佑况年齡之向邁資福廕以彌深念茲一己之微事有
萬幾之重邊聲雖捷軫慮良多精力自如過勤或倦而
又四氣交更而無不順盞多生感受而未免乖和敢殫
禱謝之誠普異神明之相潛消災滯滋至天休素履安

舒符乾剛而不息皇圖鞏固叢景福以維新無任懇禱
之至

祀廟樂章

無射宮之曲

昭成

於赫皇祖睿智聰明天扶一德海毓羣生文經武暢治
定功成禋祀無期昭垂誦聲

無射宮之曲

顯寧

天啓深仁須世而昌追惟顯考敢後光揚儀尊謚美禮

備音鏘白皇靈鑒止降釐無疆

祝文第一室

於赫聖武開運立極啓迪後人奄宅萬域繼體守文爰
及眇質大位昭升陰相之力奉薦明禋載祈載式尚祈顧
歆永深燕翼

第二室

丕顯睿祖載揚我武左右禰昆耆定區宇慶衍本支紹
纂基緒嗣服惟初禮須告祀延洪幼冲永錫繁祉

第三室

明明我祖神靈無方武定文綏于先有光運開大統德
冠百王仙馭漸遠攀慕奚極祔廟奉安縟典是式燕翼
如在英靈日赫

第四室

於皇昭考神靈在天民受陰賜餘二十年不饗其位眇
躬是傳追尊徽號永言奉先爰用昭告齋慄揭虔尚冀
申祐寶祚綿延

登明亥元神

維神摠劾成功尊臨陰位適承歲德爰誕眇躬屬秋仲
之佳辰致嚴禋之菲奠仰祈昭格永荷神休

歲星木照星

維神象緯玄穹祥開下土值茲歲事相我冲人恭伸默
禱之虔爰即絳宮之闕庶憑陰佑聿底丕平

柳宿胎星

維神光臨初度獲纂鴻圖顧惟涼薄之躬萃集簡穰之

福近因多故致祭幽壇尚冀精英更隆安吉

新船落至祭歲君文

成舟委波謂之落至維神灼知一歲之事汎彼中河轉
致厥載上下安輸惟神是賴

修五門前橋祭歲君地祇文

應門將將前臨天津玉輅所馳虹梁必陳爰搆爰締築
之陜陜神維垂祐迄于有成

五方帝祭文

因方殊號尊以帝稱殿臨五部有赫其霧維橋之作鞭
石駕梁尚冀擁衛大來百祥

擬禁酒詔

漢賜大酺歲有常數周申文誥飲戒無彛况糜粟者莫
甚於斯崇飲者刑則無赦近緣春早朝議上陳宜禁市
酺以豐民食朕詳思來奏寔為腴民可自今年某月日
民間毋得醞造酒醴致天物暴殄重傷時和其或違者
國有嚴典悔其可追故茲詔示想宜知悉

中書省牒宋三省文

中書省劄該爰自聖上即位之初重惜南北生靈之故
一視同仁首主和議故遣信使講信修睦往年征進大
軍即令各還本屯仍嚴勅邊將非奉上命毋得妄動行
人銜命以來載更歲律寂無來音何哉不惟有失告辭
反起邊釁以致攻圍我上蔡侵軼我鄧鄙襲華陽擾隨
州劫掠真陽數犯漣水此皆出於使軺已入彼疆之後
將和而戰得無異議乎夫信與義自古所恃以為國者

也一旦棄捐自有任其責者矣向也大駕巡狩北庭以平內難今巨魁授首已於正月廿六日還宮飲至頃因行臺入覲陛見之日具以奏聞請重兵壓境以問其故五月初五日奉聖旨此一事發端在我姑待之省府仰體聖上仁慈尚存兼愛恐拂初心弗允所請且夫朝廷大計已定此特有司之事耳今就委本路發司詳問焉若復遲疑不決秋高馬肥至時別有區處當司依奉省劄令差諮議官崔明道兵馬副都李合義充詳問使移

文淮東副使即今國使安在何稽留不發并節次侵疆之役具由回示以憑呈省施行請早示定議據此須至牒者

順德府大開元寺重建普門塔碑銘

國家以神武戡定區夏際海內外悉主悉臣其所以尊顯釋教彌綸元化者方往昔為最重于以推弘濟之深仁斂無量之闕福纘大寶錫群生躋六合於仁壽極樂之域豈特崇奉而已哉順德府大開元寺爰自聖天子

潛邸迄於御極持護寵錫者前後非一至精藍淨衆特
命近臣主領不與他寺比三十年間續光起廢集于大
成主僧崇巖以寺之大緣寔肇基寶塔今雖雄峙雲衢
未有紀述何以為壽無盡藏之傳至元丁丑秋懇年扎克
國師以其事請于朝制可命奉御托里傳旨翰林院定
撰合立碑文者臣謹按提點僧崇湛具列事蹟寺舊有
塔曰圓照癸酉之兵燼焉逮國朝辛卯萬安恩公來主
函丈始圖興復其感驗靈異有神化無方者初公既祝

髮心印佛乘機蟠利用鍊形辟穀面壁安禪結習於臨
老者五年建緣於清泉者有日演法出無礙妙辯濟物
現當機應身至回邪入正卻火返風雞悟靈而啄香牛
馴致而受戒寒泉復沓井之波斗粟周衆僧之供復以
慈菩根力愈竒疾拯危厄人藏髮餘珠垂舍利潔庖寮
而待館穀代公私而息繹騷其感化方便人叵具舉第
以菩薩目之以致遠通隆嚮願言皈依及廟役興得能
仁觀音舍利三顆光大殊常又易塔心柱礎因風自正

故勲貴豪富鉅商世農施馱輸給同竟事緣金幣梓林
不期而輦至藝巧工能不率而子來風動雲委畧無虛
日不十稔叠構重簷輪奐離丘文階層紀乾端坤軸藻
拱璇題翬飛塵外若乃紺瓦鱗差金輪眩彩覆法雲於
真境曜慧景於康莊絢爛動盪若金剛明中現無量化
佛仰之者火宅晨涼抑之者重昏夜曉誠法界之寶宮
河朔之傑觀也寔經始於重光單闕之仲春斷手於上
章因教之秋益簷十有三崇六十仞其工與費不可殫

紀癸卯冬師拂衣禪室歸寂真空即日有雨水花之異
塔位石像亦但化流潤若潛焉出涕者及斂大衆聞空
中來妙音樂聲雲光變幻環剎成五色樓觀中現三大
士像至有升塔投空攀號者其具戒門資萬數內嗣祖
傳法解三藏教沙門今亦千計其為世宗師感慕者蓋
如此已酉歲嗣僧崇朗因太保劉秉忠奏疏請聖上為
大功德主遂嘉納焉且聞師梵行清修乃遣近侍護葬
及建塔賜銘諡曰弘慈博化大士勅寺額曰大開元寺

塔曰普門之塔爾後累降綸恩優護贍卹靡不備至其
紹化住持曰崇潤嗣傳住持曰崇朗崇悟崇瑤至崇嚴
凡六代初緣清泉淨土寺乃大士宗姪崇音住持云臣
竊聞大雄氏之教以清淨虛寂為心方便慈悲為用愍
念大千衆生墮落苦海洪濤鼓風飄流無際世尊心運
慈航拯溺度厄俾登彼岸歸淨土正路又慮一切愛育
有迷悶終不覺其本來真心者故假像設教闕靈歛
至理絕人區事出天外弗余奚能傳悠久而警悟萬億

金方... 卷六十七
劫邪宰堵波之建假教高顯極矣然道自人弘功絲緣
立非遇間氣傑出智慧開濟大士疇克弘通法海鋪敦
教基如是光大者哉宜為聖天子終始崇奉如一特詔
賜銘以昭來世臣某拜手稽首而獻銘曰

釋迦挺生自西域靈山玄氣暢無極經從白馬肆金光
法本誠心歸利益仁皇應世憫言湮大千淪流苦海厄
教因象設濟無邊塔廟龍宮爭湧出開元大士弘慈公
五載雷轟奮雷禪窟法音演出琉璃筒建此道場化所服

高標突地跨蒼穹一日雄尊三百尺雨華大風韻流鈴
師雖示寂此長舌聖皇錫號曰普門臣今思議何惻怛
要欲手絜閻浮生濟彼仁壽極樂國臣聞大德必得壽
佛應回施無量福羅圖鞏固等彌盧聖子神孫千萬億

秋澗集卷六十七

欽定四庫全書蒼要卷一萬六千二百二十四

集部

秋澗集卷六十八

元 王惲 撰

翰林遺藁

擬中書省賀河清表

伏以天開昌運統一車書地應休禎河清陝洛

如式

恭

惟皇帝陛下德昭天漢恩溥淵泉覆露何止於中華洋
溢遠霑於方表以致潤涵九折鏡淨西涯自陝至汜幾
千里之遙由乙至丙逮三旬之久鱗介之泳游可鑑山

林之形影皆分躍圖馬於龍宮未容專美馮夷於鱗
屋時出効靈補茲上瑞之方增特表吾君之至聖臣某
等叨居華省幸覩榮光敬傾葵日之誠用代辭人之頌
遐荒嚮慕百川宗滄海而王寶祚洪延萬壽等丹丘之

固

又上澄下澈光昭四表之平
國晏民安未溢萬年之壽

擬聞捷賀表

天網雖疏魯恢恢而有失罪人斯得迓穆穆之來平外
侮既消頌聲交作臣某等誠歡誠抃頓首頓首恭惟皇

帝陛下仁含動植德媿生成振長策而用三驅念天顯
而博九族薦雷之震遠驚而邇懼大風之舉歌動而雲
揚側聞喜自於日邊豈止威加於海內臣某等職叨省
署阻奉鑿輿竚目龍旂遙伸虎拜歸收武成於周馬歌
功美邁於唐鏡六轡言還春動兩都之和氣千官飲至
歡騰萬歲之霞觴如式

中書省賀正慶八十表

甲午
歲

伏以明堂受籍萬方歸一統之尊神策探祥八秩開大

椿之首稽諸前古曾未多聞中賀恭惟皇帝陛下德本
至仁天申顯佑維神聖之廣運致功業於獨高粲然萃
三代之英蔚爾創一家之制與天立極濟世於平我澤
我威合乎南而揚乎北曰聲曰教漸于東而被于西方
且通達下情蠲除積負肆赦恩而哀矜庶獄扇泰和而
照育羣生宜福壽之貺如川方增見寅畏之心惟日不
足端臨元會光動漢儀舒化日於中天湛露恩於春酒
臣某叨承睿鑒久侍瑤階備位秉鈞何補馨香之治捧

觴上壽永膺億萬之年

如式

中書省賀尊號皇帝壽八十表

伏以廣二億而餘二億萬方歸一統之尊春八千而秋
八千六葉開大椿之首稽之載籍曾未前聞恭惟憲天
述道仁文義武大光孝皇帝陛下德本至仁天申純祐
繼一祖四宗之業兼三皇五帝之功燕翼貽謀動從民
志以太孫撫軍而重安國本以新河轉漕而通惠畿民
建大學而首善京師清中書而杜絕羣枉緩回鑿輅省

秋斂而即田功丕顯前光纂武圖而修信史惟聖神之
廣運納福壽於方來神嵩屢聽於三呼錢祖莫多於八
百顧茲鉅典稱慶宜先况盛事之難逢幸微生之親見
臣某等職司蘭省喜倍輿情順考百王寔光千古輸誠
報上區區歌天保之詩以憶祈年永永同洛書之誦

又

伏以王正紀月萬方歸一統之尊神筴儲祥八秩啓無
疆之壽况得春於上日協正氣於四時事盛來并禮須

交慶恭惟尊號陛下誕膺景命祇紹炎圖載續三代之
英創作一王之制繼天立極躋世於平化行鯨海之南
威暢龍廷之北廓廓然可謂無事巍巍乎其有成功方
且與富藏民舉免積年之負方春布德肆頒咸赦之恩
宜壽祉之方隆見嚴恭之克享端臨元會光動皇儀舒
化日於中天湛露恩於春酒臣等率先列辟拜舞稱觴
久侍台階何益體元之政願言洛誦永符垂億之年

聖壽節表

伏以日符協夢茂隆探策之祥鳳歷周星方啟同天之
運休徵滋至海宇交懽中賀恭惟尊號陛下帝學日新
聖謨天縱恢章先業垂裕後昆所欲從民為天立極以
太孫撫軍而重屬世望以新河通漕而倍溢民儲建國
庠而首善京師清中書而杜絕羣枉方翠鑿之回軫慶
玉燭之調元敬展賀儀載臨誕節臣某等承乏鼎鉉同
秉國鈞愧無金鑑之書徒切露囊之獻光瞻北極列衆
星環拱之先壽等南山伸天保不騫之祝

翰林院聖壽節賀表

伏以翠鑿回軫屬千官飲至之秋玉燭調元慶萬寶登
平之歲載臨誕節煥舉賀儀中賀恭惟尊號陛下內極
文明外昭桓撥爰從登極之初未嘗以位為樂思章先
業垂裕後昆燕貽謀而以之撫軍清中書而俾之端本
予以息肩中夏謹度侯藩上禱下祇為民斂福東征西
伐與世除殘文軌一家而不曰治安者乎煙火萬里而
可謂和樂者也尚覬惟新之政擴推不忍之仁包舉遐

荒涵濡聖擇臣等叨居詞館榮列士林敬奉霞觴俯仰
虎拜敢希金鑑之誠仰罄神嵩之頌感生北極歌有商
長發之祥壽等南山罄天保不騫之祝

謝授翰林學士表

臣惓言今日蒙恩除臣翰林學士者伏以求賢圖治
遠邁哲王養老乞言誠為重事况聖代方文明之盛在
禁林有超逸之才如臣者學術素疎桑榆垂晚俾擢升
於衆上殆選有於無中茲益伏遇皇帝陛下聖敬日躋

文思天縱紹接千年之統光揚列聖之輝舍所短而就
所長小成小而大成大敢不凝思螭首益礪辭鋒由外
臺而登玉堂固已極當代縉紳之寵約舊章而修信史
何敢企高天日月之輝如式

登寶位賀表

伏以承祧主器已欣歷數之歸助順興龍允協神人之
望事光前古運洽重熙欽惟皇帝陛下皇祖聖武之曾
孫明孝太子之嫡嗣英武同符於先帝溫文早著於春

宮扈蹕東征躬勤備至撫軍北邁我武惟揚符命自至
而呈祥宗盟樂推而同戴既深丕眷所助宜多覩大寶
之昭升將兆民之永賴中統至元之治行見增隆漢文
夏后之賢莫之獨羨光融化日歡沸民謳臣某等久事
先朝備位政府再逢嘉會喜邁輿情景命維新按軒歷
上元之統太平假樂稱瑤階萬壽之觴

老人星致語

伏以太平有象治洽金穰至德無方文綏武暢惟精誠

之上感致淵曜之輝臨臣遠自孤南光融狼北龐眉鶴
髮月帔霞冠遽踰常度之纏來展流虹之慶恭惟皇帝
陛下玉帛萬國庭衢八荒紹列聖之垂休圖舊人而共
政幾先知而聰明齊聖量包遠而恩澤無遺取憑出丙
之微明用表後天之遐筭咸躋壽域樂對昌辰南極何
深下坤維七十五度北辰伊邇拱乾位億萬餘年爰奉
徽章式申善頌其辭曰天地穹蒼一氣氤祥開來表帝
皇真九圍覆露堯天大萬有榮懷湯德新報上疇非思

下下推恩及物自親親通明殿裏長生奏願祝元貞萬
萬春

中書左丞姚公制

朕聞世祖睿臨之久有文王多士之稱如種楸楠而備
梁棟之材如積璠璣而供瑚璉之器而况先朝故老當
代名臣良用慨然想見風采故中書左丞姚某生稟淑
質世稱大儒爰自潛藩殆若神授天扶道統力主經筵
以聖道而覺斯民燭天理而息邪說智足以達其言行

辯足以濟其經綸耕桑開王業之艱征伐佐雲南之舉
罷侯置守轉官之制初行論道經邦建極之功斯在是
用圖回左轄羽翼春宮永惟佐命之勤式贊承祧之美
籥羽東序從容賢傳之嚴綸綉北門寂寞玉堂之話百
身莫贖一鑑云亡開國於營用旌直德可贈某官某諡
俯惟英爽歆此寵靈

中書左丞許公制

朕究觀世數灼見天心粵惟有不出世之君然後得大

有為之士運符千載道濟一時中書左丞許某爰自師
儒遂拜左相用之不為不重學之不為不深貞一乃心
執持苦節謀謨善斷精識造微既逢堯舜之明用安社
稷為悅君聖臣直理明道尊庶幾夷夏之安風以詩書
之教衣冠萬國雍容叔孫之儀仁義一家剴切魏徵之
諫在中統至元之治有永淳貞觀之風此其效焉功可
忘耶而復養英材於國學齊七政於璿璣白首南歸尚
深北顧憂來孔禱歔欷柱石之哀人去鑑亡瀟洒風雲

之契感時懷德想像其人恐惜卹章俾疏身後可贈某
官某諡尚期窀穸不昧欽承

翰林學士承旨王公制

人臣大節忠義為先卹典推恩古今一致故翰林學士
承旨王某道德淵深人品峻潔板蕩見忠貞之操文章
有正大之風養力息兵貽謀進諫惟軍國正撫監之體
將謳歌見厯數之歸白首匡時赤心為國庸示至公之
論曾無一己之私而又扶昌運則一代名臣鎮雅俗則

百年遺老去日漸遠有念何窮九原之氣猶生不忘宗
社三事之報斯在庶極哀榮可贈某官某諡尚冀英靈
服我休命

請上尊號奏章

臣某等言伏見陛下昭受顯號今已十年聖德神功日
新一日又聖壽新歲茂登八秩考于典禮合行再上尊
號上以贊揚功德之萬一下以罄臣子愛戴歸美之誠
謹此奏聞伏冀聖慈特賜允許

表外任進賀

聖壽節賀表

至元三年

電統中樞寶曆啟千齡之運祥開彌月瑤墀儲八葉之
奠凡在覆臨疇非鼓舞欽惟皇帝陛下聰明時又聖敬
日躋爰從在御之初未嘗以位為樂大慶同符于漢祖
宏規遠邁於唐文繼四聖之丕圖新一家之大典尊崇
故老思致隆平委任勲賢迭居宰相文之以詩書禮樂
律之以軌度儀刑薄賦輕徭省官定制尚側身而修行

每前席以賓賢察納雅言彌綸元化上所以恢章先業
下所以弘濟生民凡曰云為務從休息分總司而去積
年之弊更庶尹而削藩鎮之權尊祖配天妥宗祧於九
廟敷文柔遠舞干羽於兩階功德兼隆神人交暢以致
服前代所不能服臣上古所不得臣東夷航海以來庭
西域梯山而款服可謂振長轡以遠馭敞中國之至仁
仰惟極治之難名皆出聖慈之廣運載臨盛旦敬舉賀
章臣等猥領郡符息同天造進之千秋之金鑑遙稱萬

歲之霞觴同虎拜于揚休下列阻陪於北闕劾嵩呼而
獻祝賡歌載詠於南山

聖壽節賀表

至元四年

甲觀開祥嗣大厯無疆之服華封請祝罄後天難老之
期凡在壽臨率多呼舞中賀欽惟皇帝陛下文思天縱
聖憲日新得漢唐經國之權綱極克舜知人之濬哲以
岳牧治本也䟽之而冊授中書化源也清之以弭諧尚
兼聽以為明每得賢而恨晚溥覃祿秩優復民田有司

荷覆露之恩含氣遂生成之樂家給人足時和歲豐九
歌莫媿其神功萬事馴歸於道揆而又順長道而屈羣
醜推至悌而御多邦謂本支一出於祖宗重䟽恩而立
愛江漢終歸於淵海首繼好以息民由既睦而於變時
雍以克肖而全付所覆春際八荒之壽域天開一統之
徵祥瑞屢見於蒼麟箭罷傳於青海西窮月窟率稽顙
以來王東極扶桑復寅賓而朝日繫爾至元之盛烈於
昭曠古之深仁瑞節載臨賀儀煥舉臣某等心馳魏闕

職限侯藩阻振鷺以陪庭儼天威之在上千官飲至傳
聞置酒於南宮萬歲稱觴第切瞻光於北極

兩宮正位稱賀表

伏以正位建儲舉一代當行之典推仁被化遂萬邦咸
喜之心凡在臣鄰同音鼓舞中賀恭惟皇帝陛下道彰
坤順德益離明治首宮闈基隆國本著母儀於天下融
少海之波光謳歌見四海之歸教治豈二南之廣壯本
支於百世聳官儀於一時某等職忝侯藩心馳象闕徒

切煙花之想阻陪鷓鴣之行敢罄丹衷載陳封事德符
寶運拜揚稱三殿之觴慶衍蘿圖綿亘接萬年之統

聖壽節御史臺賀表

鼎定皇圖接千歲上元之統天開甲觀儲九秋盛德之
祥聲教所加謹呼所溥中賀恭惟皇帝陛下克文天縱
湯聖日躋爰從在御之初未嘗以位為樂躬勤儉德夢
想幽賢察納雅言恢弘治道蕩皇威於北海藉千畝於
東郊載承列聖之鴻基仍創一家之大典漢官儀之漸復

唐治具之畢張尚深闕政之思屢下卹民之詔內被災
而修行外發政以施仁明德緩刑輕徭薄稅而又天臨
睿智坐折遐衝昭曠度以無前振長轡而遠馭爰整干
戈之事終歸雨露之恩雲掃黑山孰謂玉關之久閉春
回鴨綠旋聞滄海之維清既荒外服之功尤盡內修之
理繫爾至元之盛烈於昭曠古之深仁瑞節賁臨賀儀
煥舉臣某等榮叨臺諫願切葵傾陪稱漢殿之觴仰效
露囊之獻光瞻北極罄封人上願之心壽等南山伸天

保不騫之祝

聖壽節賀表

寶厯膺期接千歲上元之統日符協夢開九秋盛德之
祥稱慶惟均際天所覆中賀恭惟皇帝陛下離明繼照
乾健乘時動順民宜更張治化未懿德而式序爾位任
吉士而勦相我家尚深闕政之思屢下子民之詔去網
更仁於湯祝敷文思格於苗頑既荒外服之功尤盡內
修之理卜營督亢宅壯陪京據山河全勝之區得貢賦

適中之地于以隆上都而觀萬國備時巡而禮高年四
聰達群下之情一豫為諸侯之度臣某等榮叨郡寄心
切葵傾阻稱漢殿之觴徒效露囊之獻運鍾北帝祚有
商長發之祥壽等南山仰天保不騫之祝

御史臺賀正旦表

至元八年為
御史時作

伏以鳳歷頒春三正協夏王之統鷄人唱曉萬方稱漢
殿之觴品位冲融衣冠環拱恭惟皇帝陛下容德乃大
盛蹟無前載新出震之權端履乘乾之位東漸滄海高

麗蒙再造之恩西極渠搜葱嶺多來庭之使國字創一
家之制朝章舉曠代之儀方漢之險何定恃乎高深蓬
萊之波旋復聞其清淺終格羽干之舞姑奉文誥之辭
咫尺天威趨承鳳闕蕩恩光於萬里醉春色於九重臣
某等久侍瑤階叨居憲府獻可替否詎能振臺閣之風
拜手揚休仰以祝河山之壽

正旦賀表

伏以玉燭調元蕤英啓堯堦之歷椒花獻頌錦封陪漢

殿之觴朝野同歡乾坤交泰中賀恭惟皇帝陛下仁涵
動植德備廣淵受籍以朝履端於始爰體春王之月屢
頒寬大之書顧軫慮之洪深濟吾民於仁壽而復開明
堂而坐治奉帝藉以躬耕摠攬皇綱務茲大本鳳城斗
轉春回萬里之農桑紫禁天開瑞靄兩都之雲氣臣某
等叨承列郡遠被恩光敢俯傾葵日之誠仰以効華封
之祝遙瞻北闕天威殆咫尺之臨壽等南山神策授萬
千之筭

史都督讓總管表

臣謹言推賢以位敢希高世之名以讓移風固有為邦之教忠雖自信政亦當然中謝伏念臣某等鷹犬微材

邊防舊鄙起家燕地分土恒陽累朝荷眷遇之恩報國之忠貞之効正以先臣之故久膺方面之權崎嶇提陽夏之師屯戍控荆門之會仰憑聖美十載無虞鎮守長江寸功何有比加寵數方驚都督於諸軍恭被朝章俾襲天倫之舊物君命累雷霆之重微軀處伯仲之間情

有難安禮宜遜讓臣兄某灼知民事素秉忠心功收製
錦之能政洽承流之體如黃霸已優於治潁何景宗遽
可以臨民伏望聖慈鑒臣至愚非敢圖私已之便寔恐
貽不及之譏念念天恭敢後周書之誠堂堂大國務先
棠棣之風謹拜表以聞

聖節望闕祝文

龍馬授圖已肇興王之迹流虹啓聖大開彌月之祥凡
居覆載之間疇非懼忻之至欽惟皇帝陛下聖謀能斷

睿智足臨天祐人歸功崇業廣西平大理蕪雲霓後望
之心南渡長江得風日清明之助爰履神明之祚恭承
祖考之休榮示至恩以昭曠度親王昆弟光輝棣萼之
樓異姓君臣揚歷金華之省尚求賢而若渴每從諫於
如流所期無曠於庶官急欲廣聞於民瘼禮百神而斂
福順三時而務農載戢干戈俾安田里施仁發政先困
窮無告之人講好息民停邊鄙喜功之奏而又兵民並
政惠愛同行鑑古昔之安危立規模於宏遠移官吏而

除累年之弊崇儒雅而興文治之風尊京師而強幹弱
枝削藩方而如臂使指分宰相於諸道專委任而責成
功置統軍於遐陬蓄精銳而消外侮唐世之時雍丕變
漢家之治具畢張以致祥風扇和時雨霈德炎洗蠻邦
之瘴春回沙漠之寒車書八方洵曰治平者也煙火萬
里可謂和樂者子民歌德化之誠心靡帝功之有當萬
寶秋風之節適羣龍首出之辰湛珠露於仙盤蕩金風
於玉宇香鬱三山之紫霧懽騰太液之蒼波吉日光臨

溥天同慶臣等叨居民部阻奉壽觴不勝葵藿之誠仰
答乾坤之造遙瞻北闕天威逮咫尺之臨拜祝南山神
筴授萬千之壽

十六年賀正旦表

任河南河北
道提刑時作

玉燭調元允協三朝之始春城回斗茂凝一氣之新正
朔所頒邇遐交慶欽惟皇帝陛下端臨丕介誕受輿圖
仁擴春寬道開時泰化日舒而民力足奔鯨沛而海道
空清明際區宇之間鼓舞樂雍熙之治尚惟事統丕顯

聖謨孜孜下達於民情念念化隆於邦憲保釐荒服減
吏冗而益監司惻憫長征數軍寔而免貧役功極見寢
兵之漸策長盡馭遠之功履茲肆覲之辰介以如山之
祝臣等欣逢盛旦叨領外臺政罔肅於簡花禱徒伸於
椒頌遙瞻宸極阻奉觥觶夢聽鈞天霑露恩於春酒對
揚休命祝聖壽於南山

聖壽節賀表

至元十七年
八月初二日

秋滿皇都荷大駕省方之豫祥歌長發屬千齡應運之

辰夙旦載逢儀章煥舉恭惟皇帝陛下聖惟桓撥智足
睿臨用式九圍大開一統爰念盈成之戒每深覆燾之
仁挈彼生民躋于壽域兵刑寢措叔帝皇之極功基業
恢弘光祖宗之丕緒儲此無量之福有來滋至之休繫
爾大元於斯為盛臣等叨持使節違遠天威雖微金鑑
之翰誠敢後封人之願祝盤銘至再天心享一德之新
嵩呼者三聖壽永萬年之筭

進瑞芝表

皇帝聖旨裏臣某等言於所領及縣界內今月某日陶
工朱良舍中產土芝一大本者伏以至和大來嘉貺昭
應爰念開先之兆聿彰承順之祥臣等誠惶誠恐頓首
頓首恭惟皇帝陛下政治慈仁敬事者舊聖惟廣運惠
澤春融德合無疆瑞草英發彤枝曄曄合為連葉之芳
紫蓋煌煌復出銅池之秀木孺漸稱於弘景郊歌美並
於班書以茲玉質之竒特著吾皇之壽適迎誕節恭覩
殊姿臣某等無任忻抃慶賀之至謹具表進獻以聞臣

某等謹言

甲申歲正旦賀表

山東憲司

伏以齊七政于璣衡統允協於夏正受四海之圖籍喜
大溢於周邦香翻白獸之尊光動黃旄之仗恭惟皇帝
陛下叡臨神筭武定文綏體元建極於中天顛任責成
於諸相惟德應上天之春遂運開一統之祥宴錫彤弓
樓畫玉關之使塵清滄海暖回陽谷之春歷觀往代之
規模未見今日之全盛尚軫憂勤之念屢頒寬大之書

便民之詔以次舉行煩民之事悉令革去廓廓然可謂
無事巍巍乎其有成功臣某等幸際鳩辰敢陳椒頌遙
下肅雍之拜如臨咫尺之威紫禁綵花夢想鈞天之奏
華封獻壽祝同嵩岳之呼如式

聖壽節賀表

伏以氣調玉燭開九秋大有之祥露湛霞觴獻天子萬
年之壽賀儀煥舉海寓同懽中賀恭惟憲天還道仁文
義武大光孝皇帝陛下立賢無方從諫弗弗畏服得所

臨之道威揚極載績之功平內難而以義減親停遐征
而敷文柔遠而又政歸一相事革多門永言夙夜之思
大得股肱之助臣某等忝膺郡寄密邇天顏歌天保以
歸休阻陪駕列罄華封而願祝竊効嵩呼

牋

千秋節賀牋

至元十八
年六月

運炎烏火見上天於穆之休

一作皇天眷命大開一統
之基甲觀呈祥適際誕彌

之帝降玄商適長發其祥之月千秋稱慶四海攸同欽

惟皇太子殿下德粹元良道隆純孝允當楚璧歷試堯
難未明問寢於龍樓思治望賢於漢苑日深子愛時御
經筵擴推不忍之仁陰作無量之賜而又維持臺憲以
振朝綱左右端人圖維國政雖一事仰資於聖斷致兩
宮咸得其歡心以茲中外之情顛切撫監之望某等內
塵法從外領雄藩恩深少海之波瀾躬侍春坊之劔履
玉卮奉壽陪鳳舞於西池鶴禁揚休等嵩呼於北闕

一作

玉卮獻酒奉鳳舞於西池

寶緒分輝伴壽昌於北極

啟

上經略史公啟

壬子年三月十七日門下王某謹齋沐頓首百拜致啟
于經略相公閣下右某言乾坤草昧建諸侯所以濟屯
茅土分封惟大人為能開國仰佐龍飛之運須資嶽降
之賢擬議以言非公孰可洪惟經略相公閣下器兼文
武運偶經綸衆推為上將之材自任於天下之重攀麟
附鳳早依日月之光捧轂推輪榮受干戈之命萃一門

之忠孝兼五略之侯封終始四朝險夷一節仁溫溫乎
冬日氣凜凜乎秋霜內蘊一誠外合萬動推而行陣則
勇摧大敵斂而康濟則澤被生民顧所遇之如何必其
材之相應鷹揚虎視收中原百戰之勲蘭畹芝芬霽漢
將千金之譽既備過人之智故多及物之功綏斯來動
斯和存者神過者化紅蓮綠水盡借籌入幕之賓長劍
危冠皆扛鼎蒙輪之士謂蟻穴尚干於天討詔龍驤暫
駐於遐陬旌旗未指於淮壩草木先聲於江左虛懷下

士宜平原賓客之三千不戰屈人切充國便宜之十二
雖閒曠不忘於武備一周旋悉本乎儒風詩書鞍馬之
間談笑風塵之外又且脫屣示讓在人所難當諸邱勝
事之初乃一旦奉身而避棄壁而負其子林回雖近於
人情捨已而與諸人季札蓋存乎教典方慶懸車之樂
復承顧命之榮乘駮駟而超天河以腹心而參廟筭增
輝白日叶贊明時力障群陰春回華夏庶事已安於漢
鼎阜民共拂於薰絃扛石之力初不讓於霍驃姚股肱

之貞豈復減於蕭相國而又量容江海利先國家顧所
收之邑委以不爭蓋先見之明知其有在果展斗間之
紫氣卒收度外之鴻名知其褒有成忠薦膺渥眷復衛
邑為之湯沐豈偶然哉錫康侯至於庶蕃固所宜也望
符輿議歡動百城顧茲襁負以偕來寔出恩威之素著
僉曰惟昔有虎苛之政于今無犬吠之虞一新污穢之
風共沐神明之化出幽谷而遷喬木孰不快哉若大旱
之望雲霓俟斯久矣此共推於公議匪獨出於私心今

衛據此上流土名沃壤衣冠之所出風化之所生奈何
而民死者積年政弊極之有日治其清靜無如宰牧之
良俗久浮佻宜審急先之務况仁深改革意切矜憐固
非賤子之當陳諒以愚衷之所激伏念某三尺微命一
介書生慚非適用之才素負讀書之念無繩以繫白日
昔年甘落佩之遷披霧而覩青天今日有彈冠之慶且
平昔想聞其風采况終身得為之主盟為喜可勝所憂
一寫聞風興起已空北海之濱杖策來歸獨愧南宮之

謁儻預蒙於剪拂庶得免於駑駘所願無他其心止此
借齒牙之餘論照枯槁於寒鄉燕麥兔葵尚異春風之
搖蕩鼠肝虫臂敢逃大冶之爐鍾庶將螢爝之微仰荷
風雲之末過此以往不知所裁某頓首再拜冒瀆尊嚴
不勝戰慄之至

上姚敬齋啓

中統元年七月六日席生王某謹齋沐頓首再拜致啓
于尚書宣撫先生閣下伏審九天頒詔側聞方岳之分

臨四海嚮風喜見太平之有自顧惟孱劣曷勝提撕况朝
廷方弘治之辰而州縣以得賢為急須獲玄德升聞之
士可副大人吐握之懷如某者稟性踈愚與人樸直斷
無他技徒切休心爰自穉年特乖庭訓雖讀書鄉曲謾
攻童子之雕蟲及學道蘇門徒竊孫登之吟嘯因霑餘
溢得列諸生然固窮不輟於絃歌念來事可為者忠孝
吾將仕矣未見其人蓋女為悅已者容士為知己者死
俄瑤翰光臨于圭竇見先生樂育之素心為喜可勝所憂

一寫何乃至於此蓋有激而云身賤貧而處世無聞跡
泥塗而遇知為貴若夫燕築臺而師郭隗豈天下之無
人備奉命而奔孔融所喜世間之有已將摳衣於不日
終瀝膽以謝誠伏惟閣下學際天人材兼文武幾年潛
卹一變經筵儀表四方股肱元聖方恭聞捷偉謝安雅
量之雍容抗表出師見葛亮忠規之遠大以致佐命收
竒功於六詔除殘債封豕於三秦盪平青海之波濤補
就蒼天之日月方聳馬空於冀北首令詔撫於山東杖

扶戴白之疲癯春動百城之草木欲隆承流宣化之權
故擴併採兼收之路慮一夫之不獲念小子以何堪戴
德若天疇恩無地比遂掃門之役庶堅磨鈍之情利一
割之鈇刀享千金於弊帚翮知短鍛敢圖運海之鵬程
言至再三恐辱知人之藻鑑過此以往未知所裁

上張左丞啓

中統元年六月日衛人王某謹齋沐頓首再拜啓事於
中書左丞宣撫相公閣下欽聞明詔來鎮雄藩凡在提

刑威增慶抃謂天下大統也尚建侯而不寧初無中外
之限方岳至重也惟得賢而俾又故咨帷幄之臣然念
德非盛大不足以鎮壓夸毗量非弘深不足以包摠細
大才非經綸不足以酬事變望非崇高不足以饜人心
恭惟閣下德富天彛道為世用望出中朝之勲舊量涵
萬里之汪洋兵濟長江符羊祜抗章之志龍興代邸偉
宋昌獨斷之能故得雨闢雲開陰消陽長雷霆驅號令
之威朝野擴網維之治繡衣南下寔承流宣化之權齊

斧西臨正摘伏破姦之日而今况河朔數路懷衛兩州

世官有晚唐擅據之強風俗近天寶塗炭之苦穢彰隣

邑政出多門其爲害也權在吏胥之手賄甘黠傑之

心敗類者能先去之善人者其自存耳闕求直言

之者故愚儒及舊政之非伏念某一介布衣半生文

吏顧其時之可出念所學之無窮北闕上書愧乏馬

周之志南山種豆每懷揚憚之風觀化明時游心至

道不求鳴於時相終混跡於常流少得見知侯喜顯

名於韓狀如蒙闕讀曾黜終老於孔門過此以還未知
所措

授翰林學士同知制誥兼充國史院編修官謝

中書省啓

中統二年秋七月廿九日王某謹齋沐頓首百拜奉啓
事于中書門下伏以幼學壯行乃吾儒之常事位尊德
薄寔君子之深憂况禁林乃清切之資而自昔極人文
之選如某者性資樸魯學術靡蕪幼窺篆刻之文稍服

鯉庭之訓而藏修茂有其素徒跼畢不去其心血指汗
顏竊弄柳州斤斧屬辭比事略窺左氏門墻賴鸚薦之
先容致囊錐之立見幸遇鴻熙之世來觀上國之光自
嗟坎井之蛙日侍幕蓮之地時乏駿足用駑馬以代馳
筆悞素屏點蒼蠅而成質方退南飛之鷁重留西掖之
垣几筵預使席之榮行李致館人之意念朱雲之耻吏
哀王孫而進殮顧影自怜捫心有託特以見知之厚遇
不無立仗之長鳴苟丐虛名盡光歸路豈意誕膺綸命

峻陟文階忝分蓮炬之光得與玉堂之選固不能奮陽
城之觀望無乃自郭隗而權輿儘不負十載夜窓燈火
之勤足以暝九原先子之目其榮已極夫復何求茲蓋
伏遇中書相公閣下柱石中朝風雲潛邸羽翼四人之
勲業文章兩漢之精華秩乃代天門無棄物父子傳溫
國之學書史備鄴侯之籤公將權衡彼自為之高下信
如寒暑卒皆遂於生成豈謂幘幪蔭及蕭艾某敢不勉
修士行恪守官箴仰酬雨露之恩俯答丘山之德蓬蓬

運海固敢期九萬里之程碌碌因人庶不在十九人之
後過此以往不知所裁謹奉啟事以聞王某頓首再拜

青詞

齋意

旱氣隆蟲歷三時而已遠守臣惶懼顧大責之難逃輒
先穀雨之辰敢罄雩求之懇預期以告於禮則宜

祈雨青詞

恐懼自修災有可消之理敬誠斯在天無不饗之心伏

念臣憚素昧臨民叨承摠寄每荷登穰之惠庶寬撫字
之憂爰自去秋迄于今歲風霾蓬勃生意焦枯時疫大
興秋種未下氣將交而寒薄雲已合而風醜既走郡祠
載呼洪造恭輸至懇光啓靈壇集道侶於琳宮宣琅函
之真誥伏望九天降監列聖垂慈分勅山川之神普下
雷霆之詔風災一返膏潤咸霑使春事無訛喜動四郊
之表秋成有望歌賡高廩之詩臣無任瞻天望聖激切
屏營之至

祈雨青詞

伏以萬物盈於兩間亭毒必資於帝力皇天祐于一德
高明庶格於精誠比者時雨愆常秋種不下重念無辜
之衆將罹饑饉之災用是罷將作而弛土木禁市酤而
重餼糧循省自修冀回哀眷氣將交而寒薄雲既密而
風醜適當龍見而雩爰致桑林之禱恭延真馭崇建靈
壇伏望列聖垂仁九天降鑒易陰陽之恒數轉運化之
玄機下勅曲豆霽靈沛流甘澍蘓槁麥於南畝播嘉穀於東

郊一滌風霾溥含生意豈惟大賚三農免失業之憂嘉
與多方高廩享有年之慶

祈雨青詞

天地乃萬物父母恐饑饉之薦臻風雨為一歲咎休顧
得失而與應念守臣之不職致春旱以為災終風且霾
種不入土近雖霑其濡潤終未至於霽霓二麥就枯羣
情懷懼念鰥寡無辜之老有溝壑立至之憂既走郡祠
載籲玄造瀝愚衷之至懇建雨部之靈場伏望真宰鑒

臨高穹陰隲溥同一視之仁大霈如膏之澤興嘉苗於
四野際和風於兩間庶寬轉側之勞共慰後蘇之望所
有報禮其敢後歟

為春旱虫災青詞

伏念天聽雖高惟至誠而能感田功未即緊歲事之可
憂敢瀝丹衷仰干玄造茲者自春徂夏時雨愆期萋
捲而步屈為災嘉禾槁而風埃蔽野吏則不德民將何
尤非恐懼以自修將蘊隆而曷已爰差穀旦乃建靈場

延致羽流恭修法供應蒼精之昏見異誠意之孚通伏
願列聖垂慈九天降鑒俯回哀眷霈甘澤於一方丕顯
神功享豐年於高廩

齋意

伏以驕陽恒若時雨未霑嘉禾稿而耕墾如焚步屈災
而春蠶闕食齋心預告於禮攸宜

為張縣尹吉求嗣青詞

伏以不孝有三身無後而為大輸誠儻至天雖高而聽

早敢瀝丹衷用干玄造伏念臣某一行作吏壯歲當官
久居簿領之間未免輕重之悞或養志罔終於恃怙或
臨民多靳於哀矜以致二子併亡半生惻獨自尊難逃
於陰譴隱憂恐及於先人敢資惟惠之仁爰謹頌天之
請敬陳清醮上叩高真伏望天眷垂哀憫孤影零丁之
苦維羆應夢廣一門嗣續之祥

為鄉人禱疾青詞

伏以民固多愚匪易天心之感老惟欲逸何堪豎疾之

嬰高以聽卑用伸懇至伏念臣某生居市閭長失義方
凡有作為不無過咎或營營於窺利或昧昧以馮生正
以貪癡愈深罪釁又緣移徙多所紛更穿掘既發其蓋
藏修治悞衝其禁忌以致災徵未已病日彌留和豫既
乖眠食稍廢揀藥徒為之暝眩朝昏遂苦於呻吟伏望
上聖垂慈高真降祐庶憑仁覆得蒙羸劣之安言念愚
衷永謹省修之戒

秋澗集卷六十八

謹按卷六十七第五頁前七行阿齊諾延舊作按赤那演
今改 七頁前五行布拉吉帶舊作卜都吉帶今改
前五行巴爾斯章舊作別速真今改 九頁後五行按
達拉舊作暗都刺今改 十一頁前五行博囉齋舊作
博免赤今改 後六行呼爾察舊作忽林赤今改 二
十二頁前四行年札克舊作鞏真今改 前五行托里
舊作脫烈今改





總校官進士臣胡榮

校對官學正臣卜維吉

謄錄監生臣魏繩曾